



Ein cyf: MA-L/LG/0497/18

Mick Antoniw AC
Cadeirydd
Y Pwyllgor Materion Cyfansoddiadol a Deddfwriaethol
Cynulliad Cenedlaethol Cymru
SeneddMCD@cynulliad.cymru

29 Awst 2018

Annwyl Mick,

Rwy'n ysgrifennu i'ch hysbysu fy mod wedi gosod memorandwm cydsyniad offeryn statudol ("y memorandwm") mewn perthynas â Rheoliadau'r Amgylchedd, Bwyd a Materion Gwledig (Diwygiadau a Dirymiadau Amrywiol) 2018 ("y Rheoliadau") a gafodd eu gwneud gan Dr Therese Coffey AS, yr Is-ysgrifennydd Gwladol dros yr Amgylchedd, ar 23 Awst. Mae'r Rheoliadau yn cynnwys diwygiadau i Ddeddf Atal a Rheoli Llygredd 1999, Deddf y Môr a Mynediad i'r Arfordir 2009 a Deddf Adnoddau Dŵr 1991, sydd oll yn cynnwys darpariaethau ar gyfer Cymru. Dymunaf roi gwybod ichi, er fy mod wedi gosod y memorandwm, nad wyf yn bwriadu gosod cynnig cydsyniad offeryn statudol.

Diben y Rheoliadau, ar y cyfan, yw gwneud diwygiadau technegol i gywiro hen gyfeiriadau at gyfraith Ewropeaidd mewn deddfwriaeth ddomestig sylfaenol ac eilaidd. Er enghraifft, pan fydd Cyfarwyddbau a Rheoliadau Ewropeaidd wedi'u diwygio neu eu disodli, ond y cyfeiriadau diweddaraf atynt heb eu trosglwyddo i ddeddfwriaeth ddomestig. Gwneir y diwygiadau er mwyn sicrhau bod y llyfr statud yn gywir cyn i'r DU ymadael â'r Undeb Ewropeaidd. Mae hyn oherwydd nad yw hen gyfeiriadau at ddeddfwriaeth yn cael eu dehongli, o reidrwydd, fel cyfeiriadau at y ddeddfwriaeth gywir (sydd wedi'u diweddarau); a bod risg felly na fyddai'r llyfr statud yn gweithio'n iawn o'r herwydd.

Mae'r Rheoliadau yn cwmpasu tiriogaeth y DU; ond mae cwmpas yr hyn y mae pob darpariaeth yn gymwys iddo yn amrywio. Mae'r diwygiadau a gynhwysir yn y Rheoliadau yn ymdrin ag ystod eang o ddeddfwriaeth ym meysydd amaeth, iechyd anifeiliaid, gwybodaeth a diogelwch amgylcheddol, bwyd, coedwigaeth, rheoli morol, pleleiddiaid, hawliau bridwyr planhigion, pysgodfeydd morol, gwirodydd, gwastraff a dŵr.

Rwyf wedi gosod y memorandwm yn unol â'r gofyniad o dan Reol Sefydlog (RhS) 30A. Rwy'n ystyried bod y Rheoliadau'n offeryn statudol perthnasol gan eu bod yn gwneud darpariaeth mewn perthynas â Chymru sy'n diwygio deddfwriaeth sylfaenol sydd o fewn cymhwysedd deddfwriaethol y Cynulliad – darpariaeth nad yw'n un gysylltiedig, ganlyniadol, drosiannol, dros dro, atodol nac arbed sy'n ymwneud â materion nad ydynt o fewn cymhwysedd deddfwriaethol y Cynulliad.

Mae'r Rheoliadau yn ddarostyngedig i'r weithdrefn negyddol yn Senedd y DU, felly cawsant eu gwneud cyn cael eu gosod; a chyn belled na fydd unrhyw Aelod Seneddol yn cynnig eu gwrthwynebu, bydd rhannau ohonynt, gan gynnwys y darpariaethau sy'n diwygio'r ddeddfwriaeth sylfaenol y cyfeirir ati isod, yn dod i rym ar 17 Medi. Mater i chi, wrth gwrs, yw penderfynu a ydych chi, y pwyllgor cyfrifol y cyfeirir ato o dan RhS 30A, yn dymuno ystyried y memorandwm ac adrodd yn ei gylch.

Rwyf wedi ystyried yn ofalus a ddylwn fynd ati i gyflwyno cynnig cydsyniad offeryn statudol o dan RhS 30A, i gynnal dadl arno ar ôl i'r 35 diwrnod a ganiateir ar gyfer craffu gan y pwyllgor sy'n gyfrifol ddod i ben. Wrth gwrs, nid yw'n ofynnol i Lywodraeth Cymru wneud hynny. Fodd bynnag, byddem fel arfer yn cyflwyno cynnig fel bod modd i'r Cynulliad roi ei gydsyniad, neu beidio, cyn i'r offeryn statudol perthnasol gael ei wneud.

Yn yr achos hwn, gan fod y Rheoliadau wedi'u gwneud yn barod, rwyf wedi penderfynu na fyddaf yn mynd ati i osod cynnig o'r fath. Nid wyf yn credu bod rhinwedd mewn cynnal dadl yn y Cynulliad ynghylch a ddylid rhoi cydsyniad i ddarpariaethau mewn Rheoliadau sydd wedi'u gwneud yn barod, pan fo'r darpariaethau hynny'n rhai technegol ac annadleuol, ac nad oes newid sylweddol i bolisi sy'n bodoli'n barod. At hynny, bydd y rhan o'r Rheoliadau sy'n diwygio deddfwriaeth sylfaenol wedi dod i rym yn barod cyn y 35 diwrnod a ganiateir o dan RhS 30A ar gyfer craffu. Mae hawl o hyd, wrth gwrs, gan unrhyw Aelod Cynulliad, os bydd yn teimlo'n gryf y dylid cynnal dadl ar y memorandwm, i osod cynnig i gynnal dadl ar hyn yn y Cyfarfod Llawn.



Lesley Griffiths AC/AM

Ysgrifennydd y Cabinet dros Ynni, Cynllunio a Materion Gwledig
Cabinet Secretary for Energy, Planning and Rural Affairs